

SL(5)592 – Rheoliadau Marchnata Hadau, Planhigion a Deunyddiau Lluosogi (Cymru) 2020

Cefndir a Diben

Mae'r Rheoliadau hyn yn diwygio deddfwriaeth marchnata domestig benodol er mwyn diweddarau a diwygio'r gofynion o ran plâu ar ddeunydd atgenneddlol planhigion at ddibenion marchnata. Mae hyn er mwyn gwneud yn siŵr bod y deunydd hwn yn rhydd i bob pwrpas rhag plâu a reoleiddir heb gwarantyn gan yr Undeb yn y man cynhyrchu, ac nad yw presenoldeb plâu o'r fath yn uwch na throthwyon penodol. Mae'r gofynion hyn yn ategu'r rhai sydd yn neddfwriaeth bresennol iechyd planhigion, wnaeth gyflwyno'r categori newydd hwn o blâu, ac yn ychwanegol atynt.

Mae'r Rheoliadau hyn yn trosi Cyfarwyddeb Weithredu'r Comisiwn (UE) 2020/177, sy'n diwygio cyfarwydddebau marchnata penodol ar gyfer hadau a deunyddiau lluosogi eraill o ran plâu planhigion ar hadau a deunyddiau atgenneddlu planhigion eraill mewn perthynas â phlâu a reoleiddir heb gwarantyn ("Cyfarwyddeb 2020"). At hynny, mae'r Rheoliadau hyn yn diwygio rheoliadau er mwyn sicrhau bod Cyfarwyddebau'r Cyngor 2008/72/EC a 2008/90/EC yn cael eu rhoi ar waith yn gywir, ac yn cywiro gwallau fformatio yn y tablau yn Rhannau 2 a 3 o Atodlen 3 i Reoliadau Tatws Hadyd (Cymru) 2016.

Gweithdrefn

Negyddol.

Materion technegol: craffu

Mae'r ddau bwynt canlynol wedi'u nodi i gyflwyno adroddiad arnynt o dan Reol Sefydlog 21.2 mewn perthynas â'r offeryn hwn.

Rheol Sefydlog 21.2(v): bod angen eglurhad pellach ynglŷn â'i ffurf neu ei ystyr am unrhyw reswm penodol.

1. Cywiro'r fformatio

Mae'r rhaglith i'r Rheoliadau hyn, a'r Nodiadau Esboniadol sy'n cyd-fynd â hwy, yn egluro bod y tablau yn Rhannau 2 a 3 o Atodlen 3 i Reoliadau Tatws Hadyd (Cymru) 2016 ("Rheoliadau 2016") yn cael eu diwygio i gywiro materion ynghylch fformatio. Er y gellir cysylltu'r newidiadau yn y tabl yn gyffredinol â'r angen i gywiro'r fformatio a chynyddu eglurder, mae dwy set o newidiadau y gellir eu dehongli fel bod yn rhai mwy sylweddol. Nodir bod y goddefiannau grŵp cyfunol (colofn 4) ar gyfer "Grŵp VI" yn y tabl a gynhwysir yn Rhan 2 a "Grŵp V" yn y tabl a gynhwysir yn Rhan 3 wedi cael eu diwygio o "-" i ")", sy'n ymddangos fel ei fod yn newid y goddefiant o ddim i 6%. Mae'r un mater yn codi o ran y fersiwn Saesneg o'r Rheoliadau hyn.

Rheol Sefydlog 21.2(vii): ei bod yn ymddangos bod anghysondebau rhwng ystyr y testun Cymraeg a'r testun Saesneg.

2. Defnyddio'r Saesneg yn y fersiwn Gymraeg

Yn y testun Cymraeg, yn y tabl cyntaf a fewnosodwyd gan reoliad 5(4)(c), ar gyfer Grŵp VI, mae'r testun yn yr ail golofn, 'Nil', yn destun Saesneg.



Rhinweddau: craffu

Mae'r tri phwynt canlynol wedi'u nodi i gyflwyno adroddiad arnynt o dan Reol Sefydlog 21.3 mewn perthynas â'r offeryn hwn.

Rheol Sefydlog 21.3(ii): ei fod o bwysigrwydd gwleidyddol neu gyfreithiol neu ei fod yn codi materion polisi cyhoeddus sy'n debyg o fod o ddiddordeb i'r Senedd

3. Dewis o weithdrefn

Gwneir y Rheoliadau hyn wrth arfer pwerau o dan adrannau 16(1), (1A), (3), (4) a 36 o Ddeddf Amrywogaethau a Hadau Planhigion 1964 ("Deddf 1964") ac adran 2(2) o Deddf y Cymunedau Ewropeaidd 1972 ("Deddf 1972"). Mae Deddf 1964 yn darparu ar gyfer gwneud rheoliadau o dan y weithdrefn negyddol, ac mae Deddf 1972 yn rhoi disgresiwn o ran a ddylai'r weithdrefn negyddol neu'r weithdrefn gadarnhaol fod yn gymwys.

Yn ôl y Memorandwm Esboniadol:

"The negative procedure will be used in this case as the discretion of the Welsh Ministers is limited over the content of these Regulations because they are giving effect to EU provisions. Further, these Regulations amend Regulations that were subject to the negative procedure."

Mae'r Pwyllgor yn derbyn bod dewis y weithdrefn negyddol yn briodol o ystyried y rhesymau hyn.

4. Amserlen ar gyfer trosi

Mae Erthygl 11 (Trosi) Cyfarwyddeb 2020 yn ei gwneud yn ofynnol i Aelod-wladwriaethau drosi Cyfarwyddeb 2020 i'w cyfraith erbyn 31 Mai 2020. Er y bu oedi cyn trosi Cyfarwyddeb 2020, cydnabyddir nad yw'r Deyrnas Unedig bellach yn Aelod-wladwriaeth o'r Undeb Ewropeaidd a bod amgylchiadau eithriadol yn sgil pandemig y Coronafeirws.

5. Diwygiadau newidiadwy

Mae rheoliadau 5(2) a 6(3(3)) o'r Rheoliadau hyn yn mewnosod diwygiadau sy'n ceisio diweddarau'r diffiniad o "Cyfarwyddeb 2014/98/EU". Esbonnir y rheswm dros y diwygiad hwn yn y troednodiadau priodol i'r rheoliadau hynny (troednodyn (2) ar dudalen 10 a throednodyn (1) ar dudalen 18) trwy gyfeirio at adran 26 o Ddeddf Deddfwriaeth (Cymru) 2019 ("Deddf 2019"). Mewnosodir y troednodiadau sy'n cynnwys cyfeiriad at adran 26 o Ddeddf 2019 ochr yn ochr â'r diwygiadau a wnaed gan y Rheoliadau hyn.

Nodir bod y "Canllawiau ar baratoi deddfwriaeth Cymru – Rhannau 2 a 3 o Ddeddf Deddfwriaeth (Cymru) 2019" yn datgan fel a ganlyn:

"Gall fod angen hefyd i ddeddfwriaeth Cymru ddiwygio deddfwriaeth nad yw Rhan 2 o Ddeddf 2019 yn gymwys iddi (megis un o Ddeddfau Senedd y Deyrnas Unedig, is-ddeddfwriaeth y Deyrnas Unedig, neu unrhyw ddeddfwriaeth Gymreig a ddeddfwyd cyn 2020). Yn yr achos hwnnw:

- Rhan 2 o Ddeddf 2019 fydd yn gymwys i ddarpariaethau'r ddeddfwriaeth ddiwygio, ond*
- Deddf 1978 [Deddf Dehongli 1978] fydd yn gymwys i unrhyw ddeunydd a fewnosodir yn y ddeddfwriaeth arall."*



O ganlyniad, mae'n ymddangos y dylai'r cyfeiriad at adran 26 o Ddeddf 2019 gyfeirio yn hytrach at adran 20A o Ddeddf Dehongli 1978, sy'n gymwys i is-ddeddfwriaeth yn rhinwedd adran 23 o Ddeddf Dehongli 1978.

6. Croesgyfeiriadau mewn testun Cymraeg

Yn nhestun Cymraeg y Rheoliadau hyn, ymddengys nad yw'r croesgyfeiriadau yn rheoliadau 5(5)(b)(i) a (ii) – sy'n diwygio Rheoliadau 2016 – yn cyfeirio at y paragraffau cywir yn nhestun Cymraeg y Rheoliadau 2016 hynny, fel y'u cyhoeddir ar wefan legislation.gov.

Y goblygiadau yn sgil ymadael â'r Undeb Ewropeaidd

Mae'n ofynnol i'r Rheoliadau hyn gynorthwyo'r DU i gyflawni ei rhwymedigaethau o dan y Cytundeb Ymadael i drosi cyfraith yr UE yn ddeddfwriaeth ddomestig, tan ddiwedd y cyfnod gweithredu (31 Rhagfyr 2020). Bydd y Rheoliadau hyn yn rhan o ddeddfwriaeth yr UE a ddargedwir ar ôl y cyfnod gweithredu.

Ymateb y Llywodraeth

Mae angen ymateb Llywodraeth Cymru mewn perthynas â Phwyntiau Technegol (1 a 2) yn ogystal â Phwyntiau Rhinweddau 5 a 6.

Trafodaeth y Pwyllgor

Trafododd y Pwyllgor yr offeryn yn ei gyfarfod ar 24 Awst ac mae'n cyflwyno adroddiad i'r Senedd yn unol â'r pwyntiau adrodd uchod a nodwyd a hefyd i dynnu sylw at faterion sy'n codi o ganlyniad i ymadawiad y DU â'r UE.

